

四庫全書

集部

欽定四庫全書

集部

鴻慶居士集卷五

詳校官石中允臣薩敏

主事臣呂雲棟覆勘

總校官降調編修臣倉聖脉

校對官編修臣徐立綱

謄錄監生臣張琮

欽定四庫全書

鴻慶居士集卷五

宋 孫覲 撰

詩

龜潭

真源閔仙局一綫下佛龕來從白馬聚洞作烏龜潭觸  
石絀瑟瑟循除走涵涵漱齒類蓄雪湔衣真佩藍醉翁  
灑面醒衰白照影慙延緣遂清景拄策縱幽探

二

心空間有味境寂澹無營石鼎脹豕腹幽幽暗泉鳴銅  
盤印鳥迹漠漠微雲行起挽枝上紅細傾榼中清提壺  
亦勸飲布穀仍催耕悠然獨往願一笑愜平生

菴畫谿行

老牯浮鼻水中歸綵雉應媒桑下飛蘿鷺冥冥山四起  
數家雞犬烟樹裏一支新淥漲晴溝楊柳中間擊小舟  
菴畫谿頭烏鳥樂呼雨喚風不能休

二

蝶趁花飛爭入坐倚空百尺遊絲墮亂山銜日半船明  
斷雲載雨前村過蕨芽戴上小兒拳漁市人歸柳貫鮮  
罨畫溪頭人語好烹魚煮蕨餉春田

三

沙頭綠暗已藏鴉竹裏猶殘一兩花蝸廬抱柳開新國  
燕語窺簾憶舊家春風有信自年年罨畫溪邊柳繫船  
陶情滿滿酒如泉醉與長瓶藉草眠

四

翠木蒼藤繚白沙  
槿籬茅店野人家  
了無狡兔營三窟  
只有黃蜂趁兩衙  
樹頭獵獵酒旗風  
罨畫溪邊賣酒翁  
銀瓶快瀉清若空  
令君一笑面生紅

龜潭

稚竹緣崖瘦蒼藤翳樹昏  
野花渾少態谷鳥自能言  
獨曳煙中策來傾月下尊  
樂哉無與共幽興在桑門

二

蝸舍三間小龜泉一勺甘楞嚴渾不看彌勒久同龕潭  
影千峰倒雲梢萬木參岩花自無主紅雨落毵毵

題董令升待制朋谿

先生谿上宅華榜有殊稱已為山作主更與谿為朋高  
甍俯流水坐見南山稜濯髮雲破碎湔衣雪崩騰老蟾  
駕月來潏灑一鏡升舉櫂擊空明玉壺響春冰夜久羣  
動息一嘯清風興手持修月斧自控赤鯉乘

題莫壽朋內翰所藏東坡畫枯木

龍筋鶴骨老催顏  
百尺脩園折巨雷  
倦鵲飛來空百繞  
踏枝不着又驚回

李茂嘉寄茶

蠻珍分到謫仙家  
斷壁殘璋裏絳紗  
擬把金釵候湯眼  
不將白玉伴脂麻

園中草木

葵花卧雨金杯覆  
蕉葉欹風羽扇低  
若信空華俱足幻  
何妨伯厚載雞栖



二

翠衿獨倚秋風立絳幘猶含宿雨偏已見異雞無應看  
若為矯首尚昂然

題德清縣舍松筠堂菊

籬脚金花玉露團  
柁叢寒蛭冷相看  
不隨桃李供春事  
且伴松筠到歲寒

餘杭道中觀何人家竹

平生不省問寒溫  
見竹欣然便扣門  
我是此君風月主

不應更與俗人言

送雪峰化主

行盡千山與萬山青鞋布襪水雲間  
龍天正統毗那室乞取凋胡一鉢還

山長老寄茶

睡魔迎我入華胥夢境倏然一蜨如不用分燈遣將去  
山翁茗盃為驅除

吳江教院首坐索詩賦

石火光中容此身只鑽故紙敝精神如今衰老渾無用  
猶有虛名誤世人

送僧慧卓

瓦盂錫杖布行纏風御冷冷意欲仙一片閒雲無倚著  
悠然吹墮野人邊

送可珪化主

龍天萬德擁金堂中有維摩六尺狀但遣文殊來問疾  
毗那一鉢滿城香

復闍黎寄示龍興舉老唱酬書一偈還之

無臺無鏡亦無塵云何去現句文身只有華嚴八千偈  
訓對毘那彼上人

題刪定侄畫卷次其韻

青尖簇簇兩春山翠疊我我十二鬟彷彿陽臺夢中見  
試憑畫手駐君顏

修上人以楞嚴圓覺二經見寄書六言

月標指上自見珠繫衣中可尋卷去與人遮眼却來問

佛徵心

鄭惇老謙老出示三賦

妙絕窺三賦雄才想二豪望驚河伯歎却走李咸逃句  
挾青邱大吟翻白雪高定知空驥北猶待九方臯

題隆上人墨梅花

一枝插向釵頭見千樹開時雪裏看愧殺道人三昧手  
盡將春色寄豪端

送五侄歸南安

綠髮青衫美少年追風一抹紫鸞鞭  
十年竹馬兒童舊洗眼來看立道邊

題因閣黎靜節軒

露葉纖纖翦綠瓊三椽瀟灑竹間亭  
青蓮池上狻猊坐碧玉壺中翡翠屏  
曉幌日移光破碎夜窻風過響瓏玲  
何人暫脫紅塵履一洗昏昏醉甦醒

二

蒼雲十畝護禪扃中有金仙不死庭  
邂逅種桃規作伴

蕭條對鶴兩忘形空華閃閃風中絮浪蕊悠悠水上萍  
珍重此君真石友歲寒不改自青青

龜潭

埋沒榛蕪不記年穿雲絡石自濺濺柳州莫作愚谿對  
乞與佳名到處傳

二

蒔竹流泉占一邱倚筇盡日看儵遊崎嶇好事無人共  
獨飲泉旁自獻酬

三

山空水淨竹娟娟  
玉爍金沙自炳然  
宿鷺驚窺潭底月  
潛魚翻動水中天

春事

茆棟依林出松扉  
傍水斜浮蒼圍百  
疊亂綠翳三叉屋  
破蝸書壁庭蕪鶴  
印沙小桃供一笑  
已著兩三花

二

閒隨白雲行倦倚  
青松立嚼蕊須鬣  
香藉草衣中濕風



從月下生月向杯中吸戴星莫匆匆秉燭要汲汲

三

黃鸝遺好音碧草縈別恨雨擢翠千尋風斂紅一寸持  
醪散百憂琢句破孤悶呼童數擊鮮無久諸郎溷

龜潭守塚僧伐去大芭蕉種二松其上賦小詩記  
之

粲粲豐肌猶外好便便大腹已中空故衣狼藉三秋雨  
破扇飄搖一夜風

二

草亡禾卒太匆匆獨有髯龍在眼中  
雨折風摧終不死  
霜根雪節貫青銅

遊金沙寺寺有陸希聲侍郎讀書堂在頤山上

一龕明滅佛前燈破械猶殘一兩僧  
說似鴻盤讀書處  
試尋幽伴拄烏藤

二

綠筍遺苞半出籬清溪一曲翠相迷  
古苔稱意環牆滿

好鳥盡情深樹啼

金沙寺端老營大藏殿小詩示之

平生不讀一行經  
解說如來最上乘  
但繞禪床行一匝  
免教鑽紙侶癡蠅

秋日

豆熟連村雨  
葉黃杭肥蘸  
水露荇香涼  
蟬已抱寒莖  
槁凍蜨猶穿晚菊忙

二

雲巘曾稜路遠蒼井梧蕭瑟隕踈黃浪浪一枕芭蕉雨  
端為幽人滴夜長

歲暮郊行

殘雪溶溶水波凍山空翠濕衣巾重東家西家酒初熟  
南枝北枝春欲動班坐偶隨鷗鷺集意行適與牛羊共  
直將萬事付狙公莫浪歡喜踏破壘

懼菴浮天閣

黃蘆吹雪滿汀洲萬里烟波接素秋數點征帆天上落

一輪斜日水中流長橋踏月隨幽伴小閣浮天賦遠遊  
便買一舟為泛宅此身何必老菟裘

向伯恭侍郎致政薌林築一堂名之曰企踈晉陵  
孫某聞而賦之

銅臭應作么夢屍當得官喁喁魚聚沫戢戢蚋集酸高  
人有遠抱一笑視鼠肝水將洗耳用山作拄頰看種芳  
茹秋菊搴秀紉春蘭披披芟荷衣采采苜蓿盤三徑倘  
真境一瓢非世歡富貴挽不來為我歌考槃

二

且學方回痴莫羨董公健誰合軀七尺浪作青紫椹更  
搖乞憐尾仍出吊喪面鄉林有老仙早具佛眼見國恩  
倘粗酬已責遂焚券驅除竹馬棄狼藉芻狗踐寥寥漢  
二傳千歲一闕捷竟日飲無何更補離騷傳

再至龜潭

歲歲來尋菴畫春看山弄水意長新不知流水今何處  
只有青山是故人

湖汭上塚繫舟丁山田舍小憩

清溪三百曲一片春風綠茅屋有人家窈窕閉深竹老去耽田里寓目快親矚風漪卷翠綃雲巘鏤蒼玉尋盟喚白鷗解佩贖黃犢獨嘯無一人傳聲滿空谷

舟次蜀山遇大風雨

阿香推雷車躡雲捕黃蛇打頭風似箭注面雨如麻篙師不改色移舟並蒼霞結纜繫桑本小定起復挈畏途失九折迷津悟三义誰知一笑中平地有褒斜

讀史

莫羨馬革裏猶堪柳車囚誰令骨作鯁且慕舌為柔自  
笑丹心折人言老語偷直將輪覆井仍取帶維舟唾面  
我勿拭溺灰汝何尤君看簀中屍起斷魏齊頭

臨安道中

莽莽原野迥練練沙水清逕封面苔滑樹隕風籊鳴小  
立聽鳥語深尋見魚行夕陽紅未斂彷彿見參橫

二



微流隱復見一曲宛秋蛇柳老蟲書葉湖平鳥篆沙青  
鞋踏雨滑烏帽倚風斜何處堪攜手宜城賣酒家

將軍樹

當年樹下遂兒嬉直到將軍衣錦時老幹千年龍化

闕

廣教寺種玉軒

道人餘淨業種竹抱雲深野色禪窓近秋聲客枕喧持  
鉏掀鼠壤插棘護龍孫不放纖塵至清暉自滿門

廣教寺湧翠閣

高夢縹渺冠曾巔一握孤雲尺五天試向堂前參翠栢  
要看地底出青蓮

某送妻母章碩人之葬道過紫藤省拜妻祖莊敏  
公及妻伯叔諸公之墓題聖因寺之壁

宰樹連山淚葉春纍纍高塚臥麒麟羊曇一慟西州去  
華屋生存有幾人

臨安羅氏占春軒

扶疎繞屋樹葱蘢一笑歡迎得此翁  
燕麥兔葵俱埽地只栽桃李占春風

寄題宜陽山周氏隱居五首

妙光菴

孤烟抱水村落日滿雲樹亂山如連環  
楊柳是門處青繚竹谿灣翠點苔石路鍾魚寂無聲  
白日掩僧戶苔盃酌雲腴香篆擢煙縷坐穩不知夕  
炯炯山月吐

佚老堂

浮生知幾何聞道苦不早過眼電掣雲轉看露晞草  
匆已解鑣馬鬣翳蓬葆夫君悟無生不待鬚髮皓朝行  
青谿曲暮宿白雲道柴門鳥跡絕槁葉風自埽竹間雨  
泠泠花上日杲杲坐對五大夫自足休吾老

堂之北有松一本五

枝蔣宣卿龍圖  
名之曰五秀

### 柳塘漁舍

老來厭朝市靜占五百弓山稜瘦如削水面清若空行  
穿萬蓋青臥載一葉紅黃甘千頭奴白鳧五尺童銀刀

貫翠縷象鼻卷碧甯一時百不知漁父真家風幽尋屬  
無事散此九節筇空濛水雲裏端坐畫屏中

環翠亭

樵磴盤蒼巘漁磯俯碧潭羣尖清染黛一曲翠按藍冉  
冉松雲細娟娟竹露涵春風萬楊柳綠影亂毵毵

五秀堂

一幹中柴立校柯擁四垂定知三世種已長五孫枝端  
是神明力非闕雨露私躊躇三帟繞為賦角弓詩

角弓事見

左傳

卓持者手持筇竹見遺書六言

滇池赤藤使者太乙青藜老仙如何一筇九節挂到玉  
女盆邊

喜陳紹曾至

雨苔荒逕石風葉擁門衡破甑渠能過虛舟任自橫燭  
殘無共影谷應有同聲試問門前轍多應是友生

重陽前數日微暑小雨遂涼

小雨送殘暑新涼入郊墟丹葉互明滅玄雲自卷舒行  
螳尚移垤盤蝸已伏廬脩脩風響變零落扇恩踈

二

披衣趁雞晨耿耿殘月曙林表霽霞升青紅滿雲樹涼  
蟬猶抱葉寒蟲欲壞戶行行繞黃菊狼籍衣上露

崑山道中

歸鳥破烟沒飛泉隔隴分松門挂疎雨樵路蹋行雲獨  
往隨漫興高談遺世紛悠然一杯酒可以傲人羣

二

日脚銜半壁江面橫匹素一片黃蘆荻撼撼風景暮閒  
枕曲肱眠自琢撚鬚句稍稍山月吐已復草多露

次韻葉首善龍圖見寄

十年流落臥漳濱種秫畦蔬手自親心似疲牛猶喘月  
身如病木豈知春試彈長鋏撩公子忽解綈袍值故人  
健筆縱橫驚老眼恍疑帝所夢韶鈞

吳漢逸家荆谿蓄古書奇器甚富余欲造觀而未



果賦小詩先之

高人卧江海烟雨三家村白眼憎俗徒青山自當門披  
圖望千載耿耿尚自存金鑄驪褭蹄漆書科蚪文虬螭  
盤六印犧象刻四尊劍包虎皮斑琴漫蛇腹紋猶吐星  
芒寒尚帶雷斧痕吾亦望古者昂昂真戴盆儻未倚門  
揮應許置榻論從公問奇字載酒過子雲

題刪定侄畫卷六言

筆下鑿開混沌眼中見此崔嵬海上神鼇負出天邊靈

鷺飛來

二

水邊兩鵲語時山下一牛鳴  
地蒼梧翠竹森然長與閒  
雲卧起

寄題四明吳廳拙軒

分寸躋攀曳九牛一錐無地拙  
于鳩穿針結縷非吾事  
不上天孫乞巧樓

二

老罷誰當問喘牛羈栖具作寄巢鳩  
蓋茅一把藏吾拙便是元龍百尺樓

寄題臨安王氏通幽軒

翠樾兩檐交復紫苔一徑微通雨  
簾猶含夏綠風苞已褪春紅

柳

修纖似束楚腰支楊柳春風二月時  
金地化身千佛眼錦江新樣十宮眉

雨

山空發清响樓迥落餘飛掩冉花頭重渾酣水面肥喧  
飀沉地鏡飄洒淨垣衣數點蒼茫裏飢烏接翅歸

二

浙瀝珠跳瓦淋浪綆縴簷園林春寂寂燈火夜厭厭寒  
著衣稜起愁牽酒戶添詩翁獨無事危坐撚衰髯

送僧德最

剝啄動柴荆相看兩眼青詩如雲態度人似鶴儀形妙

斷窺天巧哀彈感夢靈定知花雨裏亂石點頭聽

朱彥直穹石堂

擬把高天補曾將巨海填猶殘如蝸練尚帶祖龍鞭勢  
重坤輿壯根剪粵嶠連孤鶩搏鷺羽突立冠黿顛錫號  
俄三品論材但一拳誰令此奇偉偃卧獨魁然

小園春事

屋頭喚雨泥滑滑萬瓦紛披土囊發西園春事一時休  
繁紅漫亂胭脂雪綠蘿高張翠蓋羽蒼巘中斷青玉玦

不見枝上一點紅  
千頃桑麻光似潑

二

小園花柳春爭發  
風雨顛狂二三月  
斷梗梢空轉若蓬  
細紅糝逕繁如纈  
巨看繞屋溜潺潺  
可厭觸途泥活活  
不妨暫柅故人車  
大似陳公井中轄

夏日田舍

斷塹䟽新碧  
長林驚遠揚  
魚跳蒲葉偃  
鵲起樹頭昂  
覓句投詩社  
逃禪入醉鄉  
夢回殘酒裏  
月可一庭芳

二

麥卧黃雲攏秧分綠錦蛙犬來迎客怒鳥去背人啼  
虺飢雷吼昏昏醉纈迷只疑塵土溷獨自照清溪

夏日京口道中

冉冉征途去耿耿畏日長枕流浣清泚倚樹憇蒼涼蟬  
抱風枝响螢升露草光不眠愁獨夜臥看月侵床

二

亭臯一雨過清飈吹面涼雲綻微月吐引盃吸空光獨

詣敞神界冥搜破天荒扣舷歌小海幽意滿滄浪

京口普照寺

敗屋茨生草崩崖蔓老藤布金無長者持鉢有殘僧撥  
刺魚跳釜睢盱鼠瞰燈炎炎三伏暑岑絕冷如冰

都統劉侯築新第不居供佛其中號布金庵遣騎  
入泉南迎山老主之

羣魔起為祟百堵煥作灰那聞五花葉但見一莓苔將  
軍道南宅萬礎蟠金瑰天瑞黃鶴下地湧青蓮開老倦



逃禪去大士問疾來龍天擁猊坐百蠻奮春雷

一莓苔  
見杜子

美詩

吳門道中

小橋分路各西東寂寂松窓半掩蓬客夢悠揚殘酒裏  
一池荷葉雨聲中

魏江道上得小庵解裝小偈

老柳當門翠十尋桑麻一曲窈然深蒼苔滿地無人埽  
只有醪醕一架陰

示鶴林山老

應化來江右乘流出嶠南後身逢七七前話續三三坐  
見諸天繞來聽二士談更無木上坐只有佛同龕

二

一別三千里重臨十二年霜兼空老矣雪柏自依然習  
氣詩情在真心佛果圓相看無一語趺坐炷爐烟

宜興林尉山父巢仙亭

半篙綠漲狎鷗邊萬點青尖挂笏前水色山容鬪清好

吳中關市有巢仙

二

且可浮沉隨俗裏更將強健鬪關前懸知天上多官府

盍向人中作地仙

鴻慶居士集卷五

欽定四庫全書

鴻慶居士集卷六

宋 孫覲 撰

詩

浮遠堂

在江陰縣  
君山頂上

月墮山城曉沙寒水國秋雲根拔地起水柱蹴天浮紫  
翠分鰲嶺青紅雜蜃樓舟航通萬里城郭數三州刺史  
馮熊貴仙翁控鯉遊八龍追後騎五馬駐前騶露舄迎

門鵲風簾壓海牛地偏餘勝跡山好對冥收雨為催詩  
至雲應度曲留歡呼領百罰跌宕散千憂顛倒青霞披  
淋漓紫綺裘誰鑱石峴山千載記風流

連雪苦寒

霜氣森森背有芒風稜撼撼面疑鎗破衾且作龜頭縮  
短裾愁牽鶴脰長

二

怪底騎驢詠雪詩東風有信在南枝來麴已報豐年瑞

屬國餐糴且耐飢

大雪後喜晴

嶺雪斑斑在崖泉咽咽鳴一州明曉霽萬壑貯春聲  
蹬滑藤枝健沙晴屐齒輕小兒修淨供酌茗慰孤清

二

雪淨山容改風回野意新草根清漠漠沙尾碧鱗鱗  
有客推門版呼童整角巾風流楊柳似一噓散千顰

時鄒次賈

自臨川至

送鄒次賈歸臨川

不負丹雘約來尋白馬盟龍鍾着帽進爵躍倒衣迎感慨追平昔驚呼問死生殷勤一樽酒問健且同傾

二

徒步輕千里重臨賁一邱留懽不暖席索去忽偏舟惜別猶班草傳聲可置郵躊躇搔白首獨上仲宣樓

南唐門道上見桃二首

一徑青苔短短籬小桃竹外兩三枝殷勤待得黃昏月



正見斜紅卧酒卮

二

細紅如糝未全勻  
洗雨梳風日日新  
前度劉郎在何處  
故林空瑣一枝春

惠楫吉水軒

演漾浮清槺  
千凝浸綠莎  
更無野鳥渡  
自有窟蟬過  
短綆飛蒼雪  
長纓卷素波  
會須號一噫  
霹靂起龍柯

二

練練迎朝霽  
濛濛卷夜氛  
挽河半天落  
貯月一瓢分  
盪胸飽新授  
洗耳浣昔聞  
誰知望梅者  
肺渴已如焚

送刪定侄赴高安郡丞

紛紛戲事擾真情  
夢入槐宮一餉榮  
莫向蝸廬分兩國  
只將螳埵當專城  
鰲頭定自迓三顧  
楮尾何妨署一名  
南望崆峒堪挂笏  
白雲飛處眼偏明

寄題楊元光黃岩清畏軒

楊公相大歷  
獨擅德爵尊  
清渭貫涇濁  
寸膠定河渾  
高

名冠朝倫流風被仍昆悠然向千載凜凜尚自存官閒  
擁黃紬臥聽衙集喧蕭蕭鳬鷺驚行重糈不到門蝗虎不  
待驅聞風自驚奔所貴知我希已及魚與豚

題致思庵

草徑衝泥滑松門隱霧深潛魚寒入窟宿鳥瞑投林風  
樹搖青塚雲蘿倚碧潯禪翁蒙一衲寂寞海潮雲

又

宿雨連村暗春流隔隴分檣烏吟外見城角定中聞石

鼎涵蒼潤銅爐湧翠分明朝南北路相望兩孤雲

焦山吸江亭

昔年攜客寄僧龕敗屋踈籬一草菴白首重來看修竹

連山樓觀亦耽耽

東坡詩云金山樓觀何耽耽撞鐘擊鼓聞淮南焦山何有看脩竹採薪汲

水僧  
兩三

二

萬頃蒼茫一島孤潭潭雲海現毘盧問君吸盡西江水

中有曹谿一點無

再賦五至堂

猊坐諸天繞龍龕百鬼神捫蘿穿窈窕拄策上崢嶸雨  
送秋聲入風迎夜氣生脰肱一鼉吼撇烈兩島驚獨詣  
超神界真遊夢化城微吟更有味琢雪鬪僧清

二

老衲僧中龍得度佛三世苴茆製不借剖竹作如意微  
心訊空王禮足依梵帝住世無三宿應緣有五至百年  
杞國憂四大偃師戲應作如是觀浮雲本無蒂

胡恭夫勉齋

為山在進簣學海自盈科但見拳石小纔容一葦過駸  
駸拔地起千丈青坡坳漫漫拍天流萬頃翠錯磨勉齋  
何為者直意慕山河高視俯遺垤孤清鎮頽波巨植蟠  
杞樟修麟窟蛟鼉誰能探高關潜珍有隨和

靜節軒

紅紫紛紛半在亡一軒風雨送春忙青梅著子渾無數  
綠筍穿林已許長

二

蓮葉平鋪塘水滿  
棟花半落渚風清  
無言獨立蒼苔裏  
更聽黃鸝一兩聲

滁守平遠堂

魏公大雅士  
英英峙冰玉  
平反廷尉府  
共理滁陽牧  
奮髯懾狐鼠  
折筮行鳬鷺  
高眠一照廊  
坐嘯風生竹  
度堂雲雨上  
斗柄高插屋  
擺落區中緣  
超搖塵外躅  
遙蒼擁鬢髻  
漱碧韻琴筑  
雖無花解笑  
自有雲樹宿  
王春亦已

班臣畫可屢卜舉首送歸鴻寄此千里目

龜潭

繞舍蒔蘭蓀褰簾對竹君移床  
栖樾蔭脫屣護苔紋釣影垂潭  
月樵歌出嶺雲殷勤一瓢水侑此  
井中芹

二

風漣細娟娟月彩光瀾瀾庭空韻  
琴筑故入幽人耳皓白有貞色澹  
泊非世味誰能聽蛙淫喚蛟作鼓吹

雨中泊蜀山見漁人自山半負樵入舟鼓棹而去



一嶂橫青靄千漚起碧潯行穿山半腹坐占水中心  
雨松谿滑衝烟蓼嶼深時來有登涉應不繫升沉

胡橋別野

覆地紅深寸連村翠著行桑空蠶箔滿芹老燕泥香且  
泥無何飲徐思有底忙獨謠無與悟倚杖立斜陽

示龜潭文上人

露蓋青相倚雲屏翠作圍石泉鳴牛枕逕蘇上春衣井  
遂登晨汲庖烟起夕霏浮生眠食耳終不羨輕肥

二

埽石風生坐披雲雨濕衣飄飄一蟬脫獵獵兩鳬飛伏  
檻觀魚樂鉤簾待燕歸踈鐘何處寺出谷自依依

讀類說

亡是談烏有彭郎得小姑誰言鳩作婦謾道雁為奴絡  
緯那能織提壺豈解酤龜茲堪一笑非馬亦非驢

二

額痒會出耳足閒仍有蹇石頑非作燕楮老孕生雞楓

癭那因怒松枋豈是肥君看轉丸手亦復化神奇

示楓橋溫老

閭闔曾城外寒山古道西若人具眼隻與佛拍肩齊白  
浪噴鷁首黃塵送馬蹄憧憧南北路一榻有高栖

楓橋璨書記出示近詩賦長句為謝

白氎青鞋竹杖隨伏犀插腦看魁奇水如說法翻千偈  
山似哦詩蹙兩眉率爾扣門依佛寶欣然命駕有心期  
匆匆班草河橋上幾日重臨慰所思

讀靈岩圓首座詩卷

長廊籍籍履聲中  
邂逅歡迎得此公  
會續千燈齊古佛  
先拈一瓣供詩翁

二

萬境崩騰倒筆前  
飄飄落紙似雲烟  
要看墨妙供千手  
莫遣詩翁入兩肩

能仁寺悟上人來楓橋訪余索詩賦

撚斷吟鬚皺兩眉  
鏤冰琢雪等兒嬉  
解啼孤月如雞口

堪笑窮郊作許悲

韓吏部詩云有窮者孟郊郊聞雞詩云似聞孤月口能說落星心

二

老去都將筆硯焚相逢相問只寒溫更無一語堪酬對  
已入維摩不二門

讀公序詩卷

讀書過眼亦千年脫帽揮毫湧百泉句出驚傳龍困蠢  
賦成爭誦蛻連蜷銅池莖葉三山秀玉井根株七澤連  
容貌魁梧端可想不應詩瘦自臞仙

龜潭

擺落攀緣斷驅除磊砢平庭松敵老健潭水伴孤清待  
月出時看尋雲起處行相隨木上坐徙倚到參橫

二

投老一無取逃空百不聞莫叅東閣吏恐汙北山文心  
定對止水身閒臥白雲嗒然吾喪我何意傲人羣

山陽守吳子仁遺兩鶴喜而賦詩

本自驂鸞駕何因下爵羅未冲霄漢去且傍水雲過收

拾為閒伴提攜作好歌莫懷軒冕意風月共婆娑

二

縞袂貞仙馭玄裳羽客衣千年令威至萬里佐卿歸  
踏雨青苔院栖烟白板扉蕭條真老伴相對兩忘機

舟過湖汊泊丁山

雞犬三家市蓬蒿一畝宮蘿牽籬幕翠篠墮砌堆紅宿  
鳥來還去微泉咽復通幽尋殊未已落日滿疎桐

二

日下殘紅斂烟升積翠重鷗輕波浩蕩魚樂自從容野  
饒迎秋穫鄰謳相夜春田翁有真意一笑酒中逢

寄題洪巨濟中大鄱陽園亭四詠

協趣亭

一邱破天巧萬壑迴春姿使君載酒地不著鼓吹隨脩  
然一幅巾自與幽人期水淺欲平杯風細不滿旗踈踈  
殘雨裏獨理釣魚絲

翠屏洞



千岩紫翠中縹緲浮畫棟屏風十二疊坦坦見空洞攢  
青照坐寒老翠濕衣重度曲

闕

雲留舉盃送樂矣

殊未央正作南柯夢

綠楊樓

津樹正青青水拍兩岸平千章雲外合一勺烟中橫葉  
密翳鳥語波清見魚行灣碕雨初乾陂露雪正晴誰來  
聽山公著屐過橋聲

艮菴

高人擅一壑青山獨當門  
拄笏坐終日似與若人言微  
雲抱巘出細溜觸石喧絕壁掛夜斗曾費上朝暾更採  
東籬菊共盡北海樽

春霽

好雨連清夜寒聲滿四簷  
浣花紅點注著柳翠條纖宿  
潦推舟起春塗上屐黏家家操耒出途詠滿蒼黔

二

清飈洗睡昏好雨愜幽欣  
共喜當春至偏宜入夜聞  
跳

波通轍涸流澗駐爐薰激激沙頭綠晴來已十分

書事

坐睡拋書卷行歌泥酒盃那能鎖故紙莫自恥虛曩閑  
把吟鬚撚掀逢笑口開獨醒竟何事空腹吼飢雷

二

謀身殊落落隨俗信悠悠但使真心住何嫌老論偷乘  
風豈有待過坎且復休人生如寄耳豈恨拙于鳩

草堂路遇大風

覆地雲為簇，填空浪作堆。昂昂天上坐，屹屹石中雷。瀕

洞千漚發，喧阗百蟄開。白鷗底心性，玉羽自毳毼。韋蘇州詩

云水性本無靜石中固無聲如何再相激雷空轉山驚

二

雲屋互出沒，風扉自闔開。孤舟繫桑本，一曲並岩隈。翠  
甲連筐載，鮮鱗貫柳來。殷勤慰牢落，為覆掌中杯。

題惠聲伯溪亭

小檻大紅直，欲然喬林老。翠自生烟雲，蘿屬地青霞帔。

雨筴填溝赤仄錢折柳貫魚初受釣解龜挽酒看垂蓮  
便須秉燭追良夜花減春歸又一年

雪夜宿九思庵

霏霏竹間雲練練天上雪誰遣碧玉壺化作白銀闕孤  
懷愜幽欣一笑暖凍冽寒光注老眼謂是山吐月耿耿  
清不寐夜聽竹枝折

江上懷思永

沙老猶生觜江寒已伏槽長烟分聚落短日下亭臯木

脫曾巢見潮生小艇高幽懷誰與悟不見酒中豪

二

絕徼三叉路連艫萬里船一區江上宅百榼飲中仙有  
土能埋玉無膠可續絃摩挲綠苔石屐齒尚依然

讀劉方叔詩卷

雄奇郊島上清絕晉隋間已突黃初過遙追正始還冥  
搜逐幽好巧發露天慳莫作鳶肩看詩成聳兩山

二

思如湧泉水句似琢冰清刻燭翻千偈撞鐘助一鳴磨  
天無刃迹擲地有金聲好是銜杯處雲烟落紙生

獨坐

貞境閑自見哀容老更浸却無愁可解祇有病相尋莫  
引千鈞髮須存一寸心澹然無愠喜龜息自深深

正月十四日半夜大雷雨許楸仲有詩次韻三首

萬炬紅蓮陸海中車如流水馬如龍九街畫鼓春深滿  
百柁瓊艘蠟味濃底事狂雷翻地軸巨堪笑電破天容

衝泥踏雨尋歸路竹杖芒鞋取次供

二

覆雨翻雲一瞬中雷鞭擊柱起乖龍推愁正倚三杯釀  
破睡那能一枕濃桑下持鉏如許健席間失箸若為容  
詩翁只作啼嬰看萬斛珠璣唾手供

三

尚見暗塵隨馬忽驚飛電擾羣龍玄雲合沓濤頭上  
白雨渾酣乳面濃淡碧鱗生曉漲小紅漠漠放春容



只應便作尋芳計，好把鷓鴣夷載酒供。

正月十五日荆谿館然燈燕北客用前韻

虎鼠同遊十二宮，何妨蛇虺雜蛟龍。  
熒煌寶樹繁星合，泛艷金莖湛露濃。  
海鳥定知驚矍鑠，濠魚且樂共從容。  
賈生欲繫單于頸，應費朝家五餌供。

梅

北風翦水玉花飛，翠袖凌寒不自持。  
脉脉含情無一語，水邊籬落立多時。

二

纖纖蘿蔓牽茅屋細細苔花點石砭夢斷酒醒山月吐  
一枝疎影卧東窓

雨

風卷三江立雷穿九地鳴梢林百鳥散破柱一龍驚湍  
樹春深合連囊曉溜傾坐看流惡盡邑里一時清

二

池涸萍黏塊畦荒麥聚埃乖龍一味睡幽鳥百般催藥

累蒸生菌衣篝潤作梅殷勤一夜雨洗出翠千堆

竹間看雪

乍聞槁雪墮窻前已見飛花舞道邊夢斷忽驚山竹裂  
一燈照我擁書眠

二

受風豈免長低首戴雪何妨暫折腰莫道此君無特採  
風回雪霽便昂霄

題楊令藏春塢

千歲鶴林仙故家今尚存吟律破陰沍和絃名春溫王  
母仍留核韓郎為染根暗香先到處已返玉梅魂

二

汝陽紅荊帽欲挽春風回不用寶刀裁試看羯鼓催玉  
樹日日新金蓮步步開仍須覓春草隨人處處來

三

花發武陵源水滿籃橋路人面相映紅迎笑得崔護蜂  
蜨謾紛紛尋春不知處時見一葉紅相隨水東去

累石作小山鑿池引水注之

移山老翁愚埋盆小兒嬉高蹈遺世紛幽欣可人意倚  
樹看蜂衙挑燈照花睡樂哉何所憂俛仰可卒歲

建安掾朱彥寔調同安丞歸莆田枉道過余十日

而別

公子命巾車千里過我廬驚飛庭尉爵喜見丈人烏倚  
壁方挽膝推琴欲攬鬚殷勤更秉燭孤悶一時攄

二

巢枝良易安瓢飲有餘懽  
栖栖棘間矯矯如龍鸞  
抱牘見鶩進落筆蛇蚓蟠  
但令紺紙尾只為馬槽看

龜潭道中

沙淨溪行好烟梢野望新  
數峰山戴雪一曲塢藏春  
魚逐波間伴禽藏葉底身  
柳邊春信動眉目已津津

牛山道中

松雲翠離披竹日光破碎  
青瑩麥風過紅濕花露墜  
萍開龜曳尾樹啄鳥擘啄  
物物如貺予欣然與心會

晷畫連雨溪漲又餘雨霽水落喜而賦詩

編柵沿村徑囊沙壅市門蒼鱗封老幹黃耳上陳根屋  
破容身窄天低望眼昏溪邊高樹杪猶有繫舟痕

二

月挂樓鐘曉風生島樹秋林疎山獻狀池漫水分流鵲  
喜如窺牖鷗馴亦並舟一聲何處笛莫遣碧雲留

沈公序亦愛亭

吟牽東閣興靜想北窓眠室小中生白文高迥入玄回

看甲乙第已到已辰年不見門生芳歌鐘尚隱然

二

老蘿牽簷角青蕪點石稜風生長柄塵花落短檠燈危  
坐纔容膝欹眠但曲肱胷中九雲夢芥蒂亦何曾

沈公序餘閒亭

貌古鬚眉見情高耳目遺應諧聊玩世避謗莫吟詩事  
不關心處身非抱病時翛然無一事痛飲是吾師

二



隱几欲忘吾趨營老更踈判閒聊命酒引睡謾翻書祇  
有貧堪遂都無憤可攄樂哉聊卒歲應信我知魚

虎邱沼豫章詩僧也與余相遇于楓橋方丈誦所  
作除獻之侍郎生日詩有東湖孺子南極老人  
之句余愛其工賦小詩寄贈

落景下曾城遙烟起孤戍繫舟著魚磯曳杖扣僧戶忽  
逢丹霞侶自誦碧雲句嘈吟應黃鐘清絕追白紵不落  
江西派肯學邯鄲步冥搜自天得妙中有神助寅緣半

日留邂逅一笑遇詎復管中窺看沐南山霧

紹興壬子某南遷過疎山上一覽亭見擬東坡煨

芋詩刻龕之壁間詩律句法良是殆不能辨乃

宣卿侍郎守臨川時所擬作也後數日道次安

仁縣一士人吳君出宣卿詩數十解示余奇麗

清婉咀嚼有味如噉蔗然讀之惟恐盡于是拊

卷三歎而後知公置力于斯文久矣又二十年

宣卿作室荊谿山中別營一堂以平生所蓄東

坡詩文雜言長短句殘章斷稿尺牘遊嬉之作  
盡櫝藏其中號景坡自書榜仍為記刻之某欲  
具小舟造觀而宣卿召用今以集撰守吳門乃  
賦詩為之先

王公製練衣謝傅捉葵扇歛若置郵然一昔徧海縣東  
坡百世師乘雲上騎箕文爭日月光氣敵嵩華齊諸儒  
望先覺坐待成風斷一斤應手揮郢鼻無留壘公生不  
並時關捷同一機識真屬具眼造的令中眉詩亡束皙

補書受伏生所神交接混茫參差夢中睹授我筆如椽  
五色光屬聯醉上金鑾殿揮泉洒謫仙

贈鶴林山長老

玄豹文章霧沐老龍頭角泥蟠莫恨青苔踏破要令紅  
芋分殘

二

黃鶴林中佛國杜鵑花裏仙山粗了一生事大來從半  
日僧閒

東坡先生與蔣魏公遊最善宣卿侍郎蓄東坡詩  
文自公始也心慕手追遂入手于室嘗某賦景  
坡堂詩宣卿謂余知音者遂標藏之櫝中比守  
吳門治有狀璽書褒進待制敷文閣某馳小舟  
往賀宣卿出詩三章見屬句法華妙為一時絕  
唱有云正索解人那復得其誰知我固無從此  
真東坡語也輒次韻書于卷末

家聲籍籍冠中州健筆縱橫貫九流三世祖孫吳郡牧

兩朝人物晉亭侯  
顯印自快披雲覩  
哀陋空遺倚玉羞  
便恐追鋒天上去  
不辭投轄為公留

二

高名迥出中興日  
大句追還正始風  
浦上珠回孤月吐  
壁間梭躍五雲從  
景坡堂裏參差見  
飯顥山頭邂逅逢  
更追騎鯨追李白  
八門一路羽翰通

三

洲蘂霏紅風澹沲  
池光鋪練月徘徊  
乍驚醉眼生春纈

頓覺詩腸蟄夜雷坐看千言供刻燭自甘百罰恥空罍  
使君處處栽桃李為報花奴羯鼓催

景思提舉少卿出示藥寮佳篇某繼原韵上呈

連筒自灌黃精圃結轍休推蕙改車萬壑飛泉春午枕  
一蓑帶雨荷春鋤逃名尚有身為累擇利焉知貨可居  
笑指吾公門上莠一時零落已邱墟

與季萬郎中陪景思少卿遊虎邱景思季萬皆有  
詩某依韻和呈

和景思少卿韻

客來聽履上雲堦  
百尺蒼藤絡斷崖  
古井千年龍尚卧  
曾邱一曲虎為儕  
乍驚河漢懸談舌  
便覺風雲入壯懷  
小雨隨車真有意  
待催詩板挂高齋

次季萬郎中

玉梯一蹴傍天闔  
歷歷星圖手可捫  
翠濕佛衣雲漠漠  
香凝僧院雨昏昏  
曾軒下瞰三吳小  
靈阜高齊五岳尊  
大句春容兩相敵  
暫陪尊酒得重論



謝景思提舉見過用藥寮韻賦寄


璽書光麗九芝塗  
繡斧煌煌刺史車  
當路狐狸那足問  
漫山藜藿未應鋤  
使星尚供天南極  
卿月中環帝北居  
此夜光華賁岑寂  
故侯留落在郊墟

二

屋頭遙見丈人烏  
門外欣逢載酒車  
拄杖穿林花自落  
攜壺席地酒休鋤  
褰帷共看高軒過  
列戟行歸大府居  
掣電一歡寧復有空傳  
勝事滿村墟

三

行把長鑿白木柄慵眠下澤短轅車柳圍許大身空老  
瓜地將無手自鋤三徑草荒無轍迹一枝巢隱有林居  
故人觸蟄來相問終日清風滿座墟



鴻慶居士集卷六

欽定四庫全書

集部

鴻慶居士集卷九

七至

詳校官右中允

臣薩敏

主事

臣

呂雲棟覆勘

總校官降調編修

臣

倉聖脉

校對官編修

臣

徐立綱

謄錄監生

臣

張琮

欽定四庫全書

鴻慶居士集卷七

宋 孫覲 撰

。 挽詞

提刑直閣張公挽詞

荷鍤酬身後騎箕返帝旁風纏卿月暈雲掩使星光  
炯三珠在冥冥一鑑亡故交今白髮掩映涕淋浪

二

無事空心折懷新尚目存壽康駢五福德爵擅三尊靈  
落芸籤冷蛛懸畫戟昏像圖猶彷彿謾守剌舟痕

致政中奉胡公挽詞

釣石駸駸上綠苔起彈長鈇詠歸哉此翁矍鑠丹心在  
老子婆娑兩鬢催一夜劍津龍化後十年遼海鶴歸來  
匆匆鼓吹城南路往和松風萬壑哀

黃州使君朝議惠公挽詞

墨榜書名萬口傳著鞭先看祖生先一揮禮樂三十字

獨擅文章二百年，晚得朱輪今老矣。  
生存華屋尚依然，故交掩映追疇昔。  
一劍空留宰樹邊，公試別頭中第一是歲廷對策周禮

樂

吳公宜人楊氏挽詞

零落藁砧非猶殘，淚滿衣三鼎悲猶在。  
雙劍喜同歸地

占眠牛卜門迎，弔鶴飛哀哉埋玉樹。  
千古悶泉扉萬功

赴吉州  
病沒

二

種玉滿家庭聲名重十城哀衿遊子線愁絕小人羹印  
贈連三組書名載一旌誰為千字誅彷彿記平生

致政運使直閣朱公挽詞

握節來金馬飛芻上木牛能令天粟雨故作地錢流望  
寔傾三館賢勞閱百州寥寥千古恨零落掩山邱

二

蕭散烏藤杖風流白接離分茵前席滿載酒後車隨食  
鼎羅千指歌鐘擁十眉淒涼今夜月空照習家池

三

老脫尚方烏門懸刺史車真成棄竹馬直欲換金魚  
歲事千頭橘生涯萬卷書流芳知未艾蘭玉滿階除

杜子美詩

云銀甲彈箏用  
金魚換酒來

致政左司王公挽詞

東海懷疏傳西州憶謝公劍飛衝夜斗桂折臥秋風  
塵暗芸堂冷香凝粉署空潺潺千斛淚忍看一旌紅

二



解組天門上揮金里舍傍  
漸欣雙脾滿仍見一瞳方  
舊訪山中相今為地下郎  
流芳知有在鸞鵠正高翔

三

憶昨聯飛蓋初筵點後塵  
那知吹未熟已與迹俱陳  
契濶成千古悲吟待百身  
重臨更愁絕感塞鼻中辛

天台太守端明吳公挽詞

天上文昌省人中翰墨仙  
尚書心似水學士筆如椽  
視草金蓮夜哦詩錦瑟年  
玉樓方斷手又著紫鸞鞭

二

遮門皓首啼行路涕交揮不見斑衣好空隨畫翼歸蘭  
芽方獨秀華萼尚交輝試待遼東鶴千年有令威

三

貧病見交情殷勤問死生倒衣迎五馬空巷看雙旌聚  
泛盃中月分班地上荆悲吟追往事感咽氣崢嶸

宣撫簽樞胡公挽詞

幕府分弓日轅門叱馭時捫星高厯井修月上騎箕旁

面降胡泣聞聲聖主思龍驤老賓客競賦八哀詩

二

交親二紀餘貧病故人疎落落辰參似寥寥楚越如空  
勞三夜夢不辨一行書尚記喬公約垂淚滿故車

張希元承事挽詞

秀髮豪眉覆兩顙身長九尺地行仙楚人尚記庚寅日  
晉客渾疑甲子年批鳳璽書光洗眼刺鳩靈杖穩隨肩  
世人欲計吾公事膝上郎君雪滿顙

二

門外魁頭引葬簫寥寥總帳北山椒槐宮一夢驚三世  
奠殿千齡數七朝此夜星騎上南極他年跨鶴不東遼  
摩挲銅狄長安道試問飛車倘可招

提刑郎中范公挽詞

星輅出帝纒光射斗牛邊納陞傾三接埋輪聳十連那  
知憂鵬日已復夢鷄年尚遂斑衣戲俄從白布纏倚閭  
心破碎投袂涕潺湲更有門前客愁吟淚滿牋

白布纏根樹旒

旋出晉顧  
愷之傳

越國鄭夫人挽詞

翁壻相望插兩貂夫人東第閱三朝百年鐘鼎聯雙壁  
一代衣冠繼八蕭盡室全身還帝所先生遺烈在天驕  
家傳故有緇衣在且看司徒首百寮

二

舊德遺忠在禁庭天教華髮看昇平兩朝厭革從今日  
百口同袍共此身喜見金葩開大國悲傳玉樹鎮佳城

魁頭直指西州路獵獵秋風載一旌

吏部張公挽詞

千騎森森擁戟牙高齋鈴臥放朝衙官曹已踐文昌省  
門闕猶傳處士家天下麒麟新活計壁間蝌蚪舊生涯  
一炊未熟成今古零落空懸刺史車

致政中大邵公挽詞

四海聲名老鄭虔一時人物敢爭先剖符北道分千里  
擁節東州按十連住世一丸無大藥傳家三絕有遺編

魁頭直指南山路昨夜秋風正颯然

二

憶從少日望前修追數流年四十秋並轡同遊天上路  
連檣共載雪中舟傷心往事千憂結回首勞生一夢休  
見說騎鯨追汗漫只將遺蛻掩山邱

光祿董公挽詞

舊學江都相遺忠太史家絳帷今寂寞青簡尚光華謾  
奏三千牘猶傳四十車諸生半齊魯東望涕橫斜

二

帳殿旌旗卷轅門鼓角悲江邊五馬渡天上六龍飛感  
憤冠衝髮追攀肘見衣興元戡難日零落寸心違

董夫人挽詞

象服夫人貴荆釵列女風生兒真孟母擇壻得梁鴻書  
費囊衣盡杯行澗藻豐龍池飛霹靂雙劍已騰空

董令人李氏挽詞

閨苑收花去無心對紫微寥寥鶴夜怨角角雉朝飛石



竊名猶在邯鄲夢已非郎君真驥子玉立換朝衣

惠彥達承事挽詞

鳩杖尊三壽龜床閱九齡名留高士傳光掩少微星  
圯下無遺蹟江邊有獨醒潭潭餘慶在鸞鵠滿家庭

二

逐客生還後臞翁耄及時長鳴風雨夜耐老歲寒枝  
坐閱炎涼改寧隨燥濕移隻鷄澆斗酒敢忘故人期

大資政張公挽詞

大筆文章手飛揚獨妙年判花森玉笋視草對金蓮講  
肆聯重席官花臥八埭他年紬石室妙絕冠遺編

二

禮絕迂三顧恩榮閱九遷秉鈞平似砥履坦直如弦晉  
室戎和日周家鼎定年金甌方卜相颯馭已超然

三

輦路追高躅聯翩接兩駟猶蟠倚天劍尚艤濟川舟元  
帥俄分閭羈臣亦首邱一盃相屬地回首涕交流

侍郎唐公挽詞

危言屢伏青蒲上直筆猶存白簡中  
但見剗蟆救月蝕孰知煉石補天空  
牛鳴尚闔床頭蟻蛇影猶懸屋底弓  
一代風流今頓盡佳城白日臥滕公

洪內翰母夫人董氏挽詞

鴈鴒一德本來均七子劬勞詠棘薪  
種玉已成雙白璧起家還見十朱輪  
鰥扉獨步中興日麟閣他年第幾人  
送客誰為千家誄要看彤筆寫光塵

二

萬里龍沙握鼠餘古來忠孝兩全無  
范滂死去親猶在蘇武生還老益孤  
旌節盡從蠻檄落絳衣重向鯉庭趨  
天教住世如金母一笑迎還合浦珠

簽書胡公挽詞

潤色文章手論材政事科補天媧后石却日魯侯戈已  
鬱蒼生望那聞挽者歌堂堂無復有寂寞悶山阿

二

虎穴連三輔狼烟暗百蠻邊風搖馬鬣朔雪點袍斑委  
命輕于縞妝名重若山遺忠應未泯結草在兵間

三

名字標仙籍貞遊返帝闈一尊無復日百卉自爭春廢  
井無沈轄車懸有吐茵空餘峴山刺千載尚光新

平江太守侍郎王公挽詞

燕頷封侯相鷹揚國士風金貂七葉貴鼓角十州雄按  
節星軺動埋輪虎穴空誰令交一臂已失大槐宮

二

東吏重足立無家寄一錐道旁烏攫肉舍下犬生羸望  
絕重臨日哀吟去後思吳兒嘗奉我歌此送迎詩

三

通德門中見長安道上逢虛名慚薦鶚

丞相華原王當國某首蒙薦對

喜色看乘龍

公華原王之壻

流落湘江魄崎嶇楚市春相看青

眼舊獨有後凋松

羸國夫人錢氏挽詞

大國侯王後高門將相家欲知天作合故遣壽無涯夢  
澤萍如斗仙山棗似瓜鶴林花老去歸路躡青霞

二

鼎立三珠樹亭亭聳搢紳真成萬金產何止十朱輪彤  
筆方紬史芝塗尚演綸徽音千載後不數衛夫人

朝議胡公挽詞

魁壘萬夫雄堂堂望一宗名聯千佛土籍著九圍重月  
旦推三鳳風流屬二龍哀哉埋玉樹一塢悶金鐘

二

巨室蔭華穰驚聞一柱摧辛勤三世種寂寞萬牛回猶  
抱萊衣泣俄興楚挽哀功名付難弟榮路正崔嵬

霍彥明通判挽詞

龍飛第一春吏部冠斯文桂折根猶在蘭深氣自薰未  
成觀驥展已復嘆芝焚想像今何在江東有暮雲

二

契濶艱虞地勿勿喜一逢俄驚門上莠已化押中龍手



板歸囊褚腰章掩窆封空餘故人淚灑向九泉重

邵令人余氏挽詞

身老偕三壽家肥賦萬鍾給扶靈杖穩賜禮紫泥封青  
塚連雙壁蒼精蟄二龍春風吹宰樹蕭颯壠頭松

二

金母燕西瑤朱轡翟茀朝遺衣尚荆布故物有簞瓢鼎  
立栖三鳳蟬聯數七貂生涯祗如此崛鬱正昂霄

三子  
七孫

皆在  
仕籍

太令人施氏挽詞

天上駉鸞鶴人中夢虺蛇舒長真化國青白舊儒家朝  
籍通丹地宮衣曳紫霞蓬萊三萬里何處問靈槎

二

領袖三十指恩斯母德均奇厖五世祖福艾百年身零  
落悲華屋劬勞詠棘薪誰當紉女史彤筆寫光塵

通州太守錢公挽詞

舞鳳來天目馮熊並海門盡捐牛犢佩爭詠袴襦恩雁

塔名猶在棠郊爰故存龍池飛霹靂空記刺舟痕

王廷秀挽詞

朱雀烏衣巷青袍白首郎誰令呼起起便作去堂堂急  
景駒跳隙哀音雁折行慶鐘知有在庭樹正流芳

吳令人挽詞

誰識東床卧相隨廡下春懸知三復可不恨五噫從玉  
冠螭頭立芝塗玳首封諸兒荀淑侶頭角盡羣龍

茫茫水東注冉冉日西頽側手留難住揮戈挽莫回鏡  
分天上月劍逸地中雷寂寞空牀夜悲蟲亦造哀

歷陽通守張文舉挽詞

六雄唐別駕一乘漢題輿自笑儒冠誤誰能刺綉如形  
襜方首路畫翬已隨車悵望城南路哀歌淚滿裾

通守李師稷大夫同年挽詞

桂籍聯榮四十年萍漂南北兩茫然寒暄粗接無淹晷  
生死俄分有逝川黃紙尚傳批鳳詔青箱空掩絕韋編

諸郎頭角皆翁似試看煎膠為續絃

王廷茂挽詞

蟬聯三世舊晚晚二毛侵白壁成長慟青綸遂陸沈看  
雲空有淚聽雨若為心咽咽吹簫送哀湍共一音

大卿范公師厚挽詞

籍甚金閨彥從容玉帳籌垂堂懲後戒徙突慕前修忽  
作隋珠彈真成趙璧投寧辭廣武械竟脫楚儀囚蹇叔  
言猶在穀函骨未收云何即長夜不復見焚舟

孫應求承事挽詞

棣萼聯華滿故枝  
蘭芽競秀藹春霏  
荆州司馬馮熊去  
吳市仙人跨鶴歸  
綠漲一枝分柏壟  
遙蒼百疊擁松扉  
儀形故有丹青在  
想像平生果是非

吳漢逸挽詞

矚翁自是列仙儒  
豪氣駸駸若不除  
東閣尋梅詩滿篋  
西郊問柳酒盈車  
奇疆屢訪陳倉鼓  
古漆空存汲冢書  
不信青山解埋玉  
定應碧海控鯨魚

二

學省追攀四十年故人重見兩皤然艱難共出興戎後  
奄忽安知棄我先北道改轅誰解劍西州無路相鳴鞭  
傷心一夢成今古忍看麒麟臥塚邊

寶文李公挽詞

十道觀風使三朝屬老成埋輪豺虎避檄水鱷魚驚內  
閣徵書入連城負弩迎哀吟追往事空復故人情

二

絳雪飛丹鼎蒼雲覆茗杯聊從五禽戲空使萬牛回柱  
笏看山坐乘桴跨海來仙遊知有在名字記丹臺

三

五紀周旋地欣同七十稀長庚陪月曉孤鷺伴霞飛忽  
作三休去真成一夢非不知華表上白鶴幾時歸

邵久中承事挽詞

周分陝右開燕日秦廢侯家徙漢年南國棠陰猶蔽芾  
東陵瓜蔓正芊綿蒼波吐月珠還浦紫電衝星劍倚天



藉甚公孫望千載書藏萬卷有青瑣

二

手扶稅杖兩眉厖牀下諸生拜老龐講肆共推三語妙  
詩壇獨受百城降揮金屢費青錢萬種玉親收白璧雙  
一卧遽先朝露盡便隨晨鼓去逢逢

三

天書問信墨猶新杯酒邀懽跡已陳倒屣方追塵外躅  
蓋棺俄作地中身濤江灩灩三家渡風樹蕭蕭萬鬼鄰

他日故人千斛淚會應洒向塚邊麟

張大資夫人挽詞

早歲乘龍見伯鸞賜衣霞爛出齋壇自從東閣郎君貴  
只作西池阿母看紫玉簫吹丹鳳去青萍劍合兩蛟蟠  
素車白馬城南路愁見春風桂影團

族孀强氏挽詞

少日聲名推大阮一時門地數南强家肥自稱河魴貴  
廟薦猶聞澗水香羽化忽驚雙鶴去巢空不復九雛將

歸魂無用哀笳送彷彿吹簫在帝鄉

夫人兒女十一人兩女先亡

王令人蔡氏挽詞

殿極中台應淮流奕世祥佳兒王武子名父蔡中郎傳  
業青瑣在談經絳幔張懸知黑頭貴已佇白眉良蘋老  
那能采萱留祇自芳誰當授彤筆端為刻青琅

少保張公挽詞

帝閭謀元師齋壇屬老儒黃麻字大號皂纛擁前驅便  
合聯黃袞猶應冠紫樞炎炎白晝日奄忽下桑榆

二

平土疎新渥湛恩洞九泉印懸金斗大冠珥玉蟬連墜  
劍今亡矣鳴珂尚宛然風流春月柳無復似當年

三

並轡天街裏聯裾省戶中追參兩班合醉笑一尊同我  
老猶占鵬公豪正吐虹忽騎箕尾去悽斷白頭翁

周撫幹挽詞

手植千金產情高一笑揮懷竒空老去種德自家肥聯

艦收羣溺傾困振大飢誰云天未定一鷄已橫飛

二

誰續先賢傳猶推月旦評命儒通德里聽法梵王城除  
地黃金布帷裳絳帳橫何人追舊事扣角話三生

領省樞相太傅信安王挽詞

台路岩瞻峻戎藩閭寄雄九章公袞貴六纛將牙崇翊  
運三階正持危一棟隆帝閔龍化後冀北已成空

二

大號疏廷渙中權秉帝樞槐庭聯上宰芸省冠諸儒國  
瑞麟一角家肥鳳九雛便乘箕尾去彷彿在星圖

三

秉燭聯飛蓋分茵托後車兵厨十日酒記室五雲書尚  
想儀形在那聞語笑餘龍鍾隨葬後老淚滿襟裾

永嘉夫人挽詞

脂田開石窳綸閣演金葩綵服聯三組綸衣珥六珈行  
攜九節杖坐駕五雲車便坐堂堂去瑤臺有故家

二

蔽芾斗城春平反迹未陳神馳一丹旒淚濕兩朱輪故  
物悲萱草哀吟念棘薪空傳青簡上千載望光塵

運使直閣郎中張公同年挽詞

忽作霜松折猶殘舊桂叢仙山雲閣冷郎署粉闌空節  
蕩函金虎車輜掩畫熊淒涼追往事忍看一旌紅

二

門表尚巍昂尊名擅一坊珂鳴非故里星聚有新堂月

暗烏啼夜風高雁折行吾生如寄耳端是橘中藏

三

學省周旋地三朝四紀中同聽對床雨共詠舞雩風少  
日借千佛殘年獨兩翁那知有存沒老淚落新宮

魯國太夫人文氏挽詞

席寵千齡盛疏榮一品尊魏公丞相婦潞國太師孫連  
騎珂鳴里交相戟擁門平生種玉手盡室滿瑤琨

二



移孝繫慈母遺忠有世臣挺身安國步抗節犯戎塵錫  
壤開東魯持樞拱北辰寧須待彤筆詔墨在絲綸

三

鼎餽羞嘉饗溪毛薦德馨來符虺蛇夢去嘯鳳凰翎盛  
事垂千載華年閱九齡淒涼便塵迹柏壘自青青

夫人韓魏

公之婦文潞公之孫冢嗣樞密被旨使虜  
夫人聞命促行上降哀詔賜就國夫人

鴻慶居士集卷七

欽定四庫全書

鴻慶居士集卷八

宋 孫覲 撰

表狀

罷臺察提點襲慶府景靈宮謝表

狂狷妄行自罹罪罟聖神寬假尚屈刑章俾省悔尤止  
投閒散中謝伏念臣稟生陞阨逢世休明偶誦試言叨  
居冊府旋因錫對參預憲臺黜驢之技欲彈梁鵲之譏

已至瘝寘多罪擢髮有餘追訟往愆噬臍何及盡從吏  
議亟寘嚴科終受賜于帡幪得免從于縲紲茲蓋伏遇  
皇帝陛下大明博照全度包荒在刑之所禁而必誅謂  
人有不可及而可恕故于議辟無不從寬夫何頑鈍之  
資亦是閔憐之數子不問馬雖焚廐而奚傷吾何愛牛  
以釁鐘而不忍臣敢不闔門悔過銘坐圖新受粟無功  
但有欲攘之臂食芹甚美空懷自獻之心

和州上謝表

愆寔多罪更三黜于九年博大殊恩畀一麾于千里戴  
星就道揆日臨民祇奉訓詞惟深感涕中謝伏念臣以  
口耳空疎之學早塵科第而歲月推移之久屢玷官箴  
俄值龍飛利見之辰敢有屈護求伸之意曷司言責糾  
正官邪不虞忌器之嫌自作焚廬之禍然知者消未形  
之患當效曲突徙薪之謀而古人歎立說之難莫辨東  
鄰壞牆之盜仰恃帝聰之豁達屢勤詔諭之丁寧自惟  
無力可陳莫若有聞必獻讒誣甚巧不悟鄙生賣友之

心耳受輒行遂得汲黯妄言之罪俯俟黜幽之典遽聞  
使過之科脫之銓曹冗散之中付以粉社承宣之寄巧  
匠旁觀縮手方驚龍領之嬰家人阨腕興嗟遂反牛衣  
之泣茲蓋伏遇皇帝陛下功存社稷英類祖宗鞭笞戎  
蠻駕御豪傑與人不求備或能悟合于片言觀過斯知  
仁終不棄捐于一肯綮念顓愚之守尚叨器使之恩雖  
廣才疎意粗有惓惓之志而心勞政拙終無赫赫之稱

辭免召試中書舍人狀

臣推數奇窮奮身寒陋九年三黜屢觸悔尤四海一身  
旁無營助偶任言責于上聖纂圖之始請嚴邦憲于羣  
僉悞國之誅敢有意于舐康不自虞于投鼠抗孤忠而  
上列倚斷斷以無他紛衆訾以交攻舉斷斷而不可間  
關末路投畀小邦方其犯權臣之怒于一時不圖簡上帝  
之心于異日奉身而退煖席未遑趣歸覲于清光俾躡  
希于明試畫出聖神之獨斷靡由左右之先容采積凌  
兢誠難冒昧仰祈睿鑒俯察愚衷儻遷令之小嫌不愆

于公議則惡盈之大戒允蹈于斯言

辭免除中書舍人狀

臣聞侍從以論思為職書命以體要為工惟布宣難論  
之情不匿厥指則精誠自然之感罔不是孚夙號才難  
必由試可伏念臣性疎寡與學昧知方節義大閑乃其  
素守文章小技聊以自娛敢期收召之獨先進躡賢豪  
而冒寵謂牛溲馬勃俱收並蓄或能施用于寸長而蠅  
營狗苟驅去復還自足考觀于已試培樗櫟于豫章杞

梓之下吹葦籥于黃鐘大呂之間豈繫非據之敢安固  
欲知難而自己仰祈睿鑒追寢誤恩螻蟻微誠獲致額  
天之懇犬馬未効敢忘結草之圖

謝中書舍人表

支郡承流久在散材之目西垣視草遽從法從之聯中  
謝臣聞極儒者之榮莫重文章翰墨之選鼓天下之動  
實關朝廷政令之施制窺二帝之謨言合六經之訓感  
厲一時忠義之氣而武夫悔過于片言布宣九重德意



之孚而父老貪榮于垂死豈但精誠之格實繫布告之修伏念臣懵學無師褊褊自信文辭翫散久貽醬瓿之譏骨相虺隤敢歎鹽車之厄盍圖幽屏以謝空餐遽頒命紱之新加賁遺簪之舊延登學省召節已還行貳憲臺寵私未替詔尚方而給札登內使之贊書三折肱而為醫方追懲于往謬九頓首而重拜遽叨沐于殊私寵至若驚恍然就列恭惟皇帝陛下聰明元后博大真純乾龍應于天行渙風孚于邦號當有鴻文碩學之士上副

厲精更化之懷顧臣何人乃預茲選老矣既憊之力豈足舉明主于三代之隆斐然不腆之辭猶能奏薄伎于從官之內誓殫微力上答深仁

謝侍講表

散材無用早汙甘泉法從之班錫命造朝曾未閱學上賢之選共承明詔不敢固辭伏念臣讀書聊以自娛為文不求甚解偶隨宦牒進冒朝榮竊量之量已盈幾欲飲河而知止犬馬之力將盡又虞填壑以遺羞惟是偏

賦介特弗移之愚故能少護窮厄不貶之氣首叨名節  
入侍辭垣隨被贊書使陪經幄訟淺聞而自愧僅同數  
馬之工仰睿聖之日躋獨抱猶龍之歎茲蓋伏遇皇帝  
陛下人文丕煥邦命惟新敷求左右儒學之臣講聞古  
今成敗之要如臣孱陋亦與選掄以聖主責愚臣豈待  
兩端之竭而小臣乘大器預憂五技之窮莫知報德之  
方更厲匪躬之節

乞出第一狀

臣自去年謫守和州蒙恩召還聞命造朝曾未閱月都城圍閉至閏二月二十五日賊騎登城有旨宣召侍從入居禁中而羣臣悉以奔竄獨臣一二人入對內東門凡五日夜供奉殿廬獨掌書詔不敢須臾去君側兩遇淵聖皇帝車駕出幸青城率先陪扈亦不敢例以疾辭不幸二月六日變故非常臣亦拘送招討司凡五十餘日徒至三寨遂止虜酋薩高母帳中君臣隔絕不復進見忽于三月二十三日縱遣南官馮解以下二十餘人

令悉詣國相所臣獨不在選中尋問其故旁有胡小教臣以姓名屬用事貴人高尚書當得去臣用其說隨衆直筵粘罕帳前抵高尚書者亦得縱歸而薩禹母猶可留不遣會使臣持國書敦趣上道遂與馮辯等俱來臣伏念主辱臣死天下之大誼二聖北遷中外冤憤而臣獨得生還豈有面目出入朝廷間于是移疾杜門不奉朝請以待師退竄伏田里家居八日而敵人以臣非遣人數復見追取朝命督開封府捕送急若星火發卒圍

第追迹至舍匿之家惡少年二百輩持白挺執械扭以  
待拘執會大軍以行府吏無所付遂得解免窮通之餘  
包羞忍耻本求一生于九死之地而乘衰嬰瘵積而成  
疾遂纏悖眩之病精神惛恍手足顫掉頭目昏旋眇物  
顛倒纔聞人聲驚呼狂走欲赴水火比遇元祐太后垂  
簾聽政力陳懇悃乞一外任宮祠歸伏田里稍近醫藥  
以畢餘生而請五不獲命恭惟皇帝陛下入繼大統加  
恩四海靖康舊臣悉貸弗誅而臣叛違義理辜負恩私

貪生忍死見辱吏卒之手多疾曠官久妨賢者之路實  
難黽勉復玷侍從輒陳愚款上叨欽聽伏望睿慈除臣  
一外任宮觀差遣俾遠羞辱于十目之上稍弭灾患于  
垂盡之年

乞出第二狀

臣比具懇款奏陳乞一外任宮祠差遣准尚書省劄子  
奉聖旨令依舊供職者伏以靖康初政令宰相李剛知  
樞密院臣任侍御史首上疏論諸生伏闕之罪謫知和

州皇帝陛下今名綱為中書相而臣實預省屬典掌書  
命職在論思若以纖芥泯默不言臣為失職設有愚見  
因事納忠則憊寔益不安位又緣開封追捕憂悸成疾  
心氣耗散言語譫諄每行詞命錯亂失次累日竄定僅  
能成章以總覈羣吏之朝既非疾病容身之日而愛立  
輔相之始又嘗有論刺之嫌伏望聖慈檢會前奏除臣  
一外任宮觀

謝徽猷閣待制知袁州表



西垣視草豈堪老病之餘內閣紬書又玷高華之選叨  
逾過矣報稱謂何中謝伏念臣服官兩朝被遇一紀四  
備省臺之列五塵儒學之聯浸冒朝榮遂登詞禁屬狂  
寇未即鯨鯢之戮而孤臣已齊魑魅之羣龍鬪魚逃殆  
將安往巢傾卵毀而未能全旋聞左袒之呼盡解南冠  
之繫捫心悼歎顧影驚嗟寄衰病于越吟返遊魂于楚  
些恍辭屢扣懼遺填壑之羞大恩不資終委覆盆之照  
茲益伏遇皇帝陛下至仁從欲全度矜愚擢從次對清

切之途昇以方郡承宣之寄危衷增厲感涕橫流蒲柳  
衰殘已迫負薪之疾江湖悠遠永忘傾霍之心

辭免再除中書舍人狀

臣自懼嚴譴屏棄遠方聖主在上皎如白日起幽作  
匿洞見讒誣躬發德音投拭多罪名還詞禁歸覲清光  
擢之積垢汙鱣之中復昇侍從論思之職義當聞命奔  
走造朝而衰療之身積憂成疾所願假餘生于晷刻審  
難自効于涓塵須至投誠上扣聰聽臣頃遇淵聖皇帝

即位之日以國子司業擢為侍御史方中國稔四夷之禍而廟堂無一定之謀羣姦興訛匹夫橫議臣冒居言路固無獨見遠慮陪輔聰明而一時誅賞不叶公議因事論奏僅能塞責言狂意拙輕犯衆怒怨讟所歸遂成謗藪嘗論故宰相王黼誅死而蔡京方自拱州請覲大臣遊說還之賜第以為謀主宣撫使童貫王安中譚稹皆散官安置而蔡攸乃以大中大夫提舉宮觀任便舉住罪同罰異物議沸騰責任臣等諫議大夫楊時在延

和殿下宣言淵聖有蔡攸無罪之語以諷臺諫臣獨以  
為有罪論奏不已于是京攸之黨惟臣之怨張勸衛仲  
達以棄得罪既除削矣又傳逮詔獄將致之死臣論蔡  
攸父子兄弟等亦棄官而去者何為獨豈不問于是詔  
卿史臺根究臣等條奏行等兄弟親戚賓客之棄官者  
凡數十人上之有旨送大理寺約法而勸等亦貫死于  
是逃棄官守之人惟臣之怨金人犯闕李綱不忍忿忿  
欲一戰而驅之幕府吏士皆年少書生縱史以贊其決

方元若草露布以侍破賊楚天覺涓劫塞之日漏語于  
旬日之先都人戶知之臣又論李綱素不知兵難以獨  
任請以諸道兵盡付种師道節制而以綱佐之老者之  
智壯者之決或可幾萬全疏上不報是日也植三幟于  
開寶寺傍以御前報捷為名又張御幄于封邱門上以  
俟車駕臨受俘獲而王師殲焉于是行營司官屬惟臣  
之怨又論太學諸生誘眾為亂劫請人主免大人支解  
三人流血被道毀徹廬舍掠取金幣幾至內訌失今不

治他日必有握兵之臣脅制天子武夫悍卒戕害將帥  
縣殺其令丞郡殺其守尉以衆暴寡漸不可長于是太  
學諸生惟臣之怨臣又論靖康之政專務姑息大臣掠  
美嫁怨君父伏闕後學官待罪放罪可也乃降詔以獎  
其忠羣凶懼誅勿問可也乃肆赦以固其惡行營大臣  
下行使臣之職收金銀勝以悅衆心開府尹代行贊御  
之職傳詔太學以沽士譽蔡京責秘書監詞臣追數其  
過宰相甚其言卻之三及竄定無幾正蕃潛師夜遁召

兵于唐州臺諫交章論其罪惡而大臣以分兵護送家屬之功竟薄其罪主威陵夷必自茲始于是上自朝廷大臣下至大學官惟臣之怨時方蔽怙私黨以附下罔上臣獨論刺以犯權貴時方棄捐爵祿以市恩釣名臣獨矯激以招怨怒羣嘲聚罵恬不知畏觸情妄行卒蹈機穽始則蔡攸當人呂本中之流作為痛定等錄文奸言以佑其父兄又崇飾惡語以并中臣終則言事臣僚又置臣于偽官之內方杜門席藁側聽威命而轉運司

徽州縣拘留不令走逃尉挾帶將吏兩至臣家結集  
保伍鞭撻鄰里晝持挺以守夜擊斫以衛老幼愁怖水  
火不通揭榜千餘徧行境內稽察苛繞過于大辟有司  
初無被受止遽進奏官報狀遂稱聖旨施行閱兩月餘  
辛道宗潰兵入境居人駭散臣因得攜三十口竄伏草  
莽中而迎賊官吏艤舟臣門指為奸細嗾盜入室臣弟  
峴與之遇拔劍欲擊得兩夫從旁營救因得解去生生  
之具攻劫一空雖竹筍葦篋陶瓦之器盜所不取者戕



壞亦盡書籍紙劄悉投之雨中而去臣等暴露野次一  
夕三徙不自意全殆從賊官吏稍稍來還臣已無家可  
歸矣此皆臣懵學無師剛褊自用積致怨仇以踏大難  
始假朝廷之命陷于大罪中假州縣之勢加臣以橫逆  
卒負資賊之威又欲致臣于必死摧傷頓挫無復生理  
皆臣自取亦何所恨伏遇皇帝陛下廊日月之照下雷  
雨之澤一洗謗誣延登侍從肉再朽之骨收去幹之魂  
義當勉勵疲駑再勤鞭策而飢寒併至疾病侵陵形影

支離衣冠零落存闕之心未替而犬馬之力已不逮于  
駿奔市虎之謗既明而溝壑之填已侵尋于暮齒伏望  
深垂簡照追寢誤恩除臣一宮觀差遣假之歲月稍近  
醫藥怨仇悔禍得保餘生雖戴盆不可以望天而結草  
尚期于異日

辭免顯謨閣待制知平江府狀

臣資稟蠢愚數忤權要一遭誣陷遂寘嚴科負天下之  
至寃犯人臣之大惡始則州縣觀望發卒圍守至持挺

擊拆以衛終則羣盜入室指為奸細又探囊竭篋而趨  
妻子流離兄弟奔散暴露野次不知存亡疾病呻吟日  
與死迫遽叨嚴詔還復禁垣削罪籍于城旦之盡收舊  
物于從臣之橐閭閻驚歎弛拘維之禁交親改觀通問  
遺之書痛定之餘恍如隔世理宜扶僊奔走造朝而積  
憂重心形癯骨立負薪有疾力難強以驅馳俟駕而行  
罪不容于逋慢忱辭上叩全度矜從擢之次對清切之  
塗昇以方郡承宣之寄重惟涼菲彌積兢皇卧漳濱之

疴尚未逃于鬼責冒鵜梁之刺必又致于人言伏望聖  
慈收還成命保安田里以保餘生雖嘗膽坐薪莫追往  
謬當叩轅擊壤以俟太平

知平江府謝表

詔紱疏恩忽返南遷之役囊封避寵又分東顧之憂擢  
升內閣之華增重全吳之寄中謝伏念臣馮愚護短見  
謂偏衷觸情妄行自作奇禍厚誣若此一死何逃尚寬  
東市鉞鉞之誅永昇南海虫蛇之侶仰止覆盆之照俯

矜種豆之冤投豺遠屏于遠方敗履再升于華幄豈堪  
老治退筆硯于西垣止欲歸休掛衣冠于神武純誠備  
罄全度矜從猥分刺史之符再列從臣之橐心勞政拙  
已憂魏瓠之不容寢愕夢驚可見牛吳之尚喘茲蓋伏  
遇皇帝陛下聖謨天縱盛德日新炎正中微肇光武興  
王之業小雅盡廢賡周宣撥亂之詩深念三吳剗敝之  
餘改畀千里藩宣之重究其老矣自惟無益于縣官卧  
而護之尚欲無容于獄市

辭免除中書舍人第一狀

早承人乏布分藩條五月無報政之功一札有賜環之  
寵典司封駁給事殿中著名籍于鎖戶之嚴奉先塵于  
屬車之後冒恩不次殞涕何言而臣素履空疎議論迂  
闊薄才綿力用大而不勝懵學謏聞謀身而不足浸叨  
榮祿卒蹈危機鬼瞰其家天奪之魄疊疊迫桑榆之晚  
駸駸從溝壑之填終賴至仁曲全殘息遠叨名節趨覲  
嚴宸荷識拔之非常宣糜捐之敢愛仰祈睿照俯鑒微

東繭然垂盡之軀負薪未已渙若惟行之命反汗何嫌  
辭免除給事中第二狀

臣聞任人者均勞佚之宜制國者權輕重之勢汲長孺  
之直宣薄淮陽蕭望之之忠亦試馮翊因之重外何必  
居中矧今黃池赤子弄兵之初宜無勃海太守勝殘之  
効理輪屏盜拔薤鉏奸立苗欲疏烹鮮勿擾庶不負千  
里長城之寄亦少紓九重側席之憂獨在臣愚常懷此  
志忽紆名節入侍瑣闥自惟綿力薄才必無論事回天

之力如其寸長片善或有承流宣化之功稍貸一時送  
故迎新之勞浸革前世內重外輕之弊庶仰關于聖慮  
或有取于斯言許以終更少俟及瓜之代貴其來効庶  
幾橫草之酬

謝給事中表

囊封亟上甫拜恩俞詔墨未乾遽收叨召上聖軫哀憐  
之眷愚臣知稱愜之難中謝伏念臣一涉世途屢貽  
俗患鄭鼠獨推乎一國誤以璞而貴焉越犬連吠乎十洲



固非雲之罪也懼鉏傷之不勉舍飛走而欲逃賜札召  
歸屢獲解免一麾出守故遂便安恩疏左省之華地極周  
行之峻躊躇四顧俯樓三辭覆車在前可以鑒矣垂堂  
而坐亦曰殆哉重叨非據之安必召疾顛之悔茲益伏  
遇皇帝陛下紹膺寶歷宏濟大艱蒐攬衆才收還故物  
馬齒已老矣何必圖新衣敝又改兮莫如求舊故茲  
慎選誤及孱庸雖無用之材終莫稱乾坤之施而不改  
其操尚堪司風雨之晨



鴻慶居士集卷八

欽定四庫全書

鴻慶居士集卷九

宋 孫覲 撰

表狀

辭免吏部侍郎狀

稟生陞陬無以瘡人涉世迂疎動輒得咎精神耗于憂  
患屢驚馬尾之書名節壞于謗讒孰聽鼠牙之訟所願  
投棄湖海間散之地庶幾永保桑榆遲暮之年敢冀慈

憐尚勤鞭策召歸禁闥曾未踰時擢置銓曹更叨綈寵  
念艱難如此豈當以王事為辭而滿溢之餘則又以人  
言為畏仰祈睿鑒追寢誤恩伐擅而寘之河干終負素  
殮之恥維鵜而不濡其味難逃竊位之譏

謝吏部侍郎兼權直學士院表

承流支郡方叨左除之省擢貳選曹更代北扉之直寵  
恩深厚小已凌兢中謝臣聞虞書三載黜陟之文周官  
羣吏誅賞之法厯時千載分總四鎮圖籍浩繁官曹猥

衆諸郎寄坐老吏專家二年干戈倣擾之餘一時水火  
焚漂之後千創橫潰三窟旁穿世號把推坐嘲銅臭士  
無固志端若視馬曹然官不即工但直書楮尾耳深惟  
流弊常激懦衷使夫人皆從容而自居則誰當以奮發  
而為意攬轡而上初有志于澄清奏刀欲前了無施于  
盤錯空慚綿力實負初心茲蓋伏遇皇帝陛下剛德方  
亨大明繼照深鑒百王之弊一清多士之源偶以乏力  
遂當殊獎圖難有欲速之戒矯枉在馭致之功輸夙夜

之勞僮在愚公之志効涓塵之報庶逃黜伯之譏

辭免戶部尚書狀

竊以羣胡南牧大駕東巡奸雄奮臂而呼將士倒戈而  
至千官逃散萬室驚奔芻糧委于喂燼之餘金繒捐于  
盜賊之手理兩朝衰亂之緒仰繫上智之明振一時之  
絕之憂當重計臣之選各有司之出納制萬貨之低昂  
孰能破軫于肯綮之間多多益辦是宜審聽于音聲之  
際一一而吹選任或非其人誤國莫甚于此如臣者本

以簿書刀筆備藩宣之寄又以文章言語參侍從之華  
忽被詔除俾承人乏今廊廟禦戎之急惟兵民足食之  
先宜得命世經綸之才安用安生陳腐之說智有所不  
及甚虞操刀製錦之傷捐有所不為何預越俎代庖之  
事

謝戶部尚書表

備數選曹分掌三銓之法掄材計省叅戎八座之聯中  
謝竊以舉天下版圖之繁制邦內經常之費任土納四



方之貢持衡居萬貨之平輕重相權上下與足承平歲  
久奢汰日滋好大喜功悅新厭故遂底魴魚頰尾之害  
馴致牂羊墳首之妖萬乘蒙塵不備純駟羣氓擠壑不  
糝羹藜當屬能臣共圖國計顧夷傷之未起念均節之  
宜先六軍之名籍第挂空文三省之司存猶仍舊貫吏  
部毀法添差之冗公車上書特補之恩學校儒官尚崇  
文具圖書冊府當俟太平盡餅空餐畫塲浮食在宣和  
固已知此至建炎益又甚焉自非涓令改制一清流弊

之源何以富國裕民復見中興之盛顧如臣者自視闕  
然智力已窮憂責彌重若為報稱不負使令固嘗欲奮  
軀上副君父責成之意恐不勝側目必致小人妄作之  
凶茲蓋伏遇皇帝陛下親臨諸將征伐之師盡得斯民  
利病之實際苛鮮黥聚斂之臣救危扶傷塞僥倖之  
路閔茲邦用深軫聖情夫何么麼之姿亦預棟梁之數  
苟操刀而立斷初無畏首畏尾之虞則鮮絃而更張庶  
有足食足兵之望

乞宮祠狀

伏念臣愚不達禍福之機學不通古今之變遭時之亂  
所向輒窮鼠入角中計焉出矣燕巢幕上危莫甚焉惟  
命之畸繫天之戮當靖康之北狩兩遇諸戎問鼎之師  
逮逮炎之東巡再見羣凶伏闕之禍雖衝冠之髮共憤  
而當車之臂何為進退怔營俯仰愧忤洗虞淵之日而  
大臣成建辟之功操魯陽之戈而諸將底勤王之績乃  
獨尸于榮祿浸獲戾于官箴汗浹背芒寄顏無所心馳

夢繞顧影欲逃重慚區區毀瓦之求莫致惓惓戀軒之  
意伏望皇帝陛下矜愚護短悼屈傷窮許解民部之官  
特畀真祠之秩知難之義得免于阿容從欲之仁仰希  
于鴻造

乞郡狀

伏念臣偶脫淮南兵火之威復值錢塘戎馬之亂梟雄  
跋扈宮闕震驚當一時遭變之初共有枕戈之怒殆諸  
將策勲之日獨無橫草之勞以茲憂愧之餘始上退休

之乞虺隤無用猶有望于蓋惟腕脫奚為恐遂填于溝  
壑敢圖恩紀尚閔俞音俯加簪履之矜未忍寔諸閒散  
尚有藩維之託或可備于驅馳廩卹流亡誅鉏乾沒平  
刑息訟奉法守公備宣夙夜之勤或有涓埃之補伏望  
皇帝陛下哀憐故物保惠餘生不使在梁之鵲食無功  
之祿庶使乘軒之鶴逃竊位之誅

謝龍圖閣學士知溫州表

南臺民版之司疇庸弗効內閣義圖之峻渙寵非常聳

吏民瞻望之華極儒學遭逢之盛省循非分榮懼交中  
中謝伏念臣讀古人之糟粕而求復其初守先王之遺蘆  
而不稽其變嬰時多故為世疇人衆目銜于明廷百口  
休于大造視搶榆之笑奚為搏南海之風感涸轍之呼  
安用激西江之水遂無施于尺寸徒自醜于心目空受  
支離十束之薪謾索侏儒一囊之粟始冒昧有籲天之  
乞尚依回懷擇地之嫌牘奏上陳方虞大戾黷聰感徹  
更冒寵恩聯近臣之籍于殿中未覺長安之遠分刺史

之符于海上難忘魏闕之存茲蓋伏遇皇帝陛下義在  
均勞仁先求舊視其髮種種豈有能為悅其胷肩肩遂  
忘其醜重叨殊寵實異初心辭劇就簡豈平生之所望  
奉法循理尚歲計之有餘

謝賜對衣金帶表

龍靈賁冒金服光華四牡倭遲七衣安吉叨逾莫儼拜  
舞知榮中謝伏念臣孤碌碌無以喻人惓惓粗知許國  
牛衣卧泣常抱百憂馬革裹屍願効一死屬上聖宵旰

焦勞之日豈羣臣曳婁閒暇之時故褰裳有揭厲之思  
而著鞭恨功名之晚茲益伏遇皇帝陛下仁先厚下樂  
在與賢分頒出笥之珍加賁章身之寵義無擇事願希  
王陽叱馭之風忠以致身庶幾季路結纓之節

龍圖閣學士再知平江府謝表

內閣寶儲促上邃嚴之直全吳巨屏叨居方面之崇欣  
逢白首之遺民復還青毡之舊物恍如昨夢祇忝明恩  
中謝伏念臣涉世闊疏空慚懵學逢辰休顯浸冒官榮



獨荷三朝識拔之恩偏塵兩禁高華之選分符海上漸  
收遲暮之身改命吳中又玷藩宣之重追尋陳迹宣布  
寬條千里江山不改承平之觀四鄰鷄犬一空盜賊之  
餘閭里呻吟田萊蕪沒攀金城之柳衰病何以堪之訪  
玄都之桃飄零殆無存者茲益伏遇皇帝陛下官人作  
哲厚下施仁俯憐簪履之遺加惠桑榆之晚無三江之  
壤悼靈光之獨存矜一介之臣望神山而已遠擢從小  
郡移牧通都申畫封圻撫綏凋瘵虎頭食肉敢忘意于

古人馬革裹屍庶捐軀于異日

提舉南京鴻慶宮謝表

兩怒之言溢惡盍從竄殛之刑一夫之泣向隅尚畀哀  
矜之典仰御恩施俯激懦衷中謝伏念臣許身甚遇逢  
世大亂頻年于衆怒不容甚疾小人更得小人之目力  
排聚斂乃貽聚斂之譏事之好還理固如此區區本志  
願効狄山一障之乘碌碌全生敢懷范蠡扁舟之意卒  
從吏議追褫官資全報國之無期但捫心而永歎茲益

伏遇皇帝陛下政先幽黜寬在罪歟季布罷歸豈待一  
人之毀樂羊何罪其如三篋之書卒解免于大訶俾退  
安于真館東隅之失誰改事于桑榆北闕之存終係心  
于江海

辭免除龍圖閣待制知臨安府狀

竄迹窮閭叨榮膺仕偶塵薄技遂蹈危機所願鋪張太  
平累洽之宏休不虞值遭家國非常之大變靖康國破  
淵聖表降亟欲援吾君擠陷于不測之危豈復計此身

誅絕于中興之後比喧公議請寘嚴科屬乘輿方事于東巡而旰食尚勤于北固仰勤睿斷申論德音凡此誤朝誰為首禍俾二聖辱在于泥塗而不問則一時失言于翰墨而何尤卒解免于譴訶尚叨塵于器使逮明受勤王之舉正建康移蹕之初國步奠安大明黜陟臺省建白久逴誅夷茲謂衆君子興邦之時豈容一小人辱國之罪始從吏議追褫官資薦致溢惡之言浸成不赦之咎敢圖簡記未忍棄捐擢居嚴近之班復備藩維之託

顧疾病呻吟之久積罪愆汗累之餘衆人藉躋而無嫌  
羣盜猖狂而未已百罹如此行見死生禍福之分一飽  
無期豈復富貴功名之望伏望皇帝陛下發好生之大  
德推從欲之深仁察臣竝畧之量已盈憫臣鐘漏之期  
將盡俾安餘命以就窮途非敢効邵平以放侯種東陵  
之謀不幾乎田橫以庶人守海島之意所有復待制恩  
命未敢祇受知臨安府指揮亦乞寢罷依舊宮觀差遣

辭免第二狀

臣云更敢輒違詔命即日單騎就夜無程到本府交割職事已具奏聞而臣犬馬迫切之誠尚未冒浼須至奏陳者伏念臣愚暗剛褊動輒得咎分于聖世永為天下之棄民敢意慈憐尚軫故物清資顯秩起于徒步之中衰病增光感涕交下所當即日奉詔奔走造官豈應更飾矯偽不情之詞固為遜避上煩聖督之嚴而區區之情實有不獲已者臣聞洪鐘咽于微撞小器溢于大受故陳力以不能而止官人為器使之宜儻不量力之

所任以貪一時苟且之榮則道盡途窮必致失職敗官  
之悔恭惟行殿暫駐會稽以錢塘為扞蔽自經戎馬披  
猖之後水銷火燎滌地而盡千瘡百孔不可措手若但  
陰拱熟眎則創殘疲瘵之俗何自息肩必欲小有更張  
則僥倖不便之人必致大作謗讟自非素有聞望足以  
彈壓羣小號為剛明能以身任衆怨庶幾歲月之內可  
冀分寸之功如臣德輶望輕起于閒廢通都大邑十目  
所視吹壺懲沸救過不暇安能于度外有所為以稱塞

明詔伏望皇帝陛下察臣狂愚有素非擇地于艱難多  
故之時閔臣已老無用恐敗事于緩急有為之際特賜  
解免改用能臣依前宮觀差遣

知臨安府謝表

已試無狀久不勝于羣言驅去復還終未捐于一青畀  
行殿保釐之託躡西清嚴近之華中謝伏念臣小技矜  
愚褊心忤物怒每生乎溢惡譽多出于過情繫乍賢乍  
佞之無常故三仕三黜而未已點蒼蠅于誤墨得本自



于偶然訪遺鹿于覆蕉了不知其所在忽紆紹紱又起  
民編擢孤臣于罪愆汙累之餘付一方于兵火創殘之  
後丹心空在白首重來子卿牧海上之羊節旄盡落令  
威化遼東之鶴城郭今非茲蓋伏遇皇帝陛下運道樞  
以應寰中秉智燭而觀天下使愚使智丕昭厲世之規作福  
作威躬攬御臣之柄故茲頑鈍尚欲使令聽長樂之鐘  
未覺九重之遠守北門之籥終期一死之酬

臨安府乞宮觀第一狀

臣多病早衰體羸氣弱適當春夏淫雨之時乘虛中濕  
瘡疥大作兩足尤甚不能鞞鞞方欲奏陳乞寘閒散而  
張琪賊馬侵犯州縣裏瘡疥事戴星而出雖遇私忌不  
敢在假上賴朝廷威靈逋寇遠遁一方救寧而臣所苦  
瘡瘍浸劇臨見吏民迎餞使客行立趨走氣血下注更  
無減損之候失今不治漸至深痼必為廢人伏念臣自  
三月初承乏彫郡庫無錢庫無粟固嘗丐請于朝廷又  
嘗科敷于州縣督酒稅檢制吏謾鞭撻羣偷殆無遺入

計今錢物見在尚可以支吾至七八月秋稼登場人人可為矣臣吏能淺薄已試無効固不敢求候于多事之時而臨安大府東南輿區又非尸祿卧疴之所伏望聖慈察臣別無規避特賜解罷除臣宮觀遣差一次

臨安府乞宮觀第二狀

右臣已具奏乞解罷今任除一宮觀差遣未蒙施行須至投誠上瀆天聽伏念臣被遇三朝叨塵六郡顧吏能淺薄干城固圉初無尺寸可采之勞而時事艱難避寵

辭榮又涉逋慢不恭之罪藩宣大府更歷三時避讒畏  
譏進退惟谷校錐刀于權酤征商之賤劓荆棘于頽垣  
敗塹之中送往迎來筋骸難強擲風沐雨疾病交侵道  
盡途窮咎深謫滿伏望皇帝陛下憐其衰瘵畀以安全  
與其悼犬馬之死于蓋帷孰若貸擗櫟之生于斤斧

謝復宮表

削迹籍中俾輸薪粲加恩區內復齒搢紳施重邱山懼  
深淵谷中謝伏念臣乖于時而少與遇自用而不回方

當衆人皆欲毀之時而有通國稱不孝之罪一夫造訕  
濟以羣咻三免投荒瀕以萬死老妻懼不測病六日而  
沒幼女失所恃生十歲而亡獨寄命于窮交遂委身于  
謗數繫刀頭之舐蜜其獲幾何視井眉之居餅所喪如  
此分甘永棄尚軫慈憐茲蓋伏遇皇帝陛下禮秩百神  
方均大慶歡刑四表未忍遐遺聞孺子入井之聲而動  
其心覩一夫向隅之泣而慘不樂遂超常法復畀周行  
自惟放逐衰病之餘莫稱收拾哀矜之意丹心未折白

首何為指鼻炙眉方追前恩黥面補劓誓畢此生

復左朝奉郎謝表

萬里竄流幾徧大地山河之境一言感徹復見中天日月之明發迹窮閭增光末路冒恩不次撫已知慙中謝竊惟天下國家治亂之原實繫君子小人消長之勢部分南北垣列東西兩曾參之孰是孰非一王遵之乍賢乍佞聽言固未易也知人豈不難哉臣與讒人初無纖芥逢權臣之怒遽興大謗挾獄吏之助遂中深人鑿空

造端課無責有驟齒徙鄉之惡旋夷編戶之氓自惟斷  
斷之無他宜免饒饒而上訴方其心迹之未辯竊楚相  
之璧雖百口何以自明要之名實不可欺投郿塢之金  
而真盜然後乃見已自分此身實恨于九泉之下不圖  
蒙大造起廢于一日之間公議既申寃狀自白茲益伏  
遇皇帝陛下堯仁天覆周道砥平殛鯀而舉臯陶忠邪  
已判烹阿大夫而封印墨毀譽乃公凡籲一時無告之  
寃已動九重益高之聽念臣久罹讒黜曲賜辨明知臣

已迫衰殘特加甄敘惜羽翰于敗履出芝困于枯枝大  
恩不貲叨逾過矣餘生向盡稱効蔑然西方佛已謂人  
而為鬼鬼復為人歷三生而懷恩未泯北山公亦云子  
既生孫孫又生子累十世而圖報難忘

乞宮祠狀

臣頃以非才被遇三朝徧塵法從負乘致寇自速顛除  
籍隲為民飲水飯蔬無復榮望惟是平生大節橫被誣  
執濫蠲破壞以致掃地中夜起坐慨然興嗟竊惟明天



子在上聖學高妙為百王之冠不下堂窺牖固已盡得  
是非善惡之實于四方萬里之遠宜容援昧而不辯明  
旦未死亡終見天日屬者乾剛獨斷渙發德音作福作  
威皆自己出哀閔無告保全名節于二紀積垢汙壤之  
後刊除囚籍追復官裳志願滿足瞑目無所恨矣第頽  
齡向盡懷恩不復尚圖橫草之功而馬老虺隤貪戀君  
軒猶有敝帷之望伏乞聖慈除臣宮觀一次俾奉香火  
畢此餘年雖雲天悠遠無復望清光于屬車豹尾之中

而湖海寬閒猶能詠帝力于歌田牛角之上

謝復右文殿修撰提舉江州太平興國宮表

屬精更化方臨極辯之朝竊食偷安更冒非常之寵中  
謝臣聞紬書秘殿所以待四方儒學之英均秩殊庭所  
以獎一時勲勞之舊直廬地禁真館身閒聽九重朝鐘  
暮鼓之音奉千齡晨香夜燈之祝併疏異數驟及非材  
伏念臣頃獻瞽言塵兩科俊造之選旋躋撫仕汙三朝  
嚴近之班中秘書鉛槧之勤御史府統綱之寄代言西

披視草北門瑣闥論思金華勸講分貳選曹三銓之寄  
進長地官八座之崇四升內閣之華五殿大邦之重據  
衆人必爭之地貪四海欲得之求官謗薦興刑禍隨至  
投誠麋鹿之野永儕魑魅之羣潦倒半生泝浴萬里皇  
明燭隱大度包荒洗滌厚誣甄敘崇秩伶俜弱質已無  
牛羊踐履之憂晬晚餘齡遂有犬馬蓋帷之望茲益伏  
遇皇帝陛下興念青氊之故物久為白首之窮囚推轂  
鐘不忍之仁示解網好生之德清資顯秩驟起于途中

晚節未塗微榮于望外逮茲晚遇實過初心曾未暮年  
薦叨三錫食芹而美矣豈堪効野人之薦君盤種豆而  
翰之猶能偕鄰翁以供王命

乞致仕狀

臣被遇三朝叨塵兩禁更中外之選凡五十二年蒙履  
育之恩今七十九歲中緣罪戾久去朝行遭值清明盡  
從昭洗雖葵藿所向未嘗忘存闕之心而蒲柳之衰盡  
披露守邱之願況已過臣子引年之制尚竊希君父養

老之仁伏望聖慈許臣致仕哀矜簪履貢冒蓋惟俾全  
螻蟻之微軀獲有終于後福莫報邱山之大德竊見愧  
于平生

乞致仕劄子

某年踰八十尚玷吏籍疾病衰殘心志凋喪耳目昏聩  
犬馬之力不復自效理合知止伏望特為奏陳許令致  
仕上還印綬歸復田里為農為圃邵轅擊壤歌詠聖化  
度此餘年不勝區區願望

辭免待制狀

臣服事三朝効官五紀駕馬戀棧且已屢貽濡味之譏  
神虎挂衣冠亦再上乞骸之請忽紆詔綍尚軫遺簪還  
畀西清荷橐之聯永為東路角中之寵念已過臣子引  
年之制有慚知止之風更叨蒙聖恩念舊臣之仁益負  
貪榮之愧所有待制恩命不敢祇受

謝敷文閣待制致仕表

滛懇書辭輒冒乞身之請俞音賜可亟推從欲之仁興

念三朝故物之遺復玷兩禁侍臣之選超逾若此稱劾  
蔑然中謝伏念臣頃繇東朝廷之覲元帥府猥先諸老  
際會千齡奉寶玉于一龍上天之初負羈縻于五馬渡  
江之日羣趨帳殿每預疇咨分直鰲扉嘗蒙特召名浮  
過實咎積挺災一挂丹書遂至白首龍鐘老矣僅存頃  
溝壑之餘彭舞歸歟詎有收桑榆之望敢圖簡記猶冒  
抽揚俾綴甘泉伏內之班以為菟裘林下之寵茲蓋伏  
遇皇帝陛下遇隆求舊德大包荒雖疲瘵衰病之身自

甘永棄而收拾哀憐之意未忍遐遺賜下行之禮以垂  
褒鑒三命之恭而拜貺曷云得謝茲謂饗榮念永違咫尺之威無復就堯之日願少忍須臾之死尚堪歌舜之  
風

落職謝表

乞身辭仕已度亡期投老殘年亦開九秩偶緩斯須之  
死猶未厭于人言不加悼耄之刑蓋終存乎典禮雖仰戴  
邱山之重實深負淵谷之虞中謝伏念臣六世陳人朽



敗之餘四朝故物漂零之後新豐翁右臂已折杜陵老  
左耳亦聾無復二毛唯餘兩齒已挂冠避賢者路薦更  
歲月之久行就木為土中身祇在旦暮之間尚玷臺評  
盍從吏議茲蓋伏遇皇帝陛下方從孝治尚禮高年加  
惠困窮宜念舊惡况已奉身而退可以止矣抑又削迹  
不容為己甚焉何足誅鉏姑示鑄褫然雷霆之下寧無  
失匕筴之驚而犬馬之微猶有賜蓋帷之望

謝復敷文閣待制表

窮途起廢收故臣於散地之中禁路疏榮聯近侍于屬  
車之後拜恩不次撫已奚勝中謝伏念臣書元豐民版  
之丁擢大觀儒科之選偶塵薄技冒浸官榮參從橐之  
華備藩符之託侵尋六世可謂陳人際會千齡已成大  
耄聽正元供奉之曲朝士無多見天寶時世之妝外人  
應笑敢圖殘息尚簡清衷加畀崇資復還舊觀雖東海  
之賜金已盡久已寂寥而西清之命級惟新足為榮耀  
茲益伏遇皇帝陛下篤求人之舊推養老之仁謂百歲

之遺賾尚賜高年之爵況四朝之故物猶存一介之臣  
興衰無用之身捐德不報之所獨念戴盆之首顧難以  
望天惟有傾藿之心不忘于向日

賀太上皇帝傳寶位表


聖謨獨運決大策于一言神器有歸垂鴻名于千載高  
視百王之表永臻萬壽之朋中賀恭惟太上皇帝陛下  
燕清淨無為之宗守慈儉不爭之寶希夷體道淵默凝  
神冠帝號之尊為太上皇極人倫之貴為天子父奉卮

前殿間寢南樓訪崆峒而得聖人清築新豐而享天下  
養臣退安畎畝莫預鳬趨遙望闕庭惟深燕賀大興孝  
治方躬曾閔之難坐格泰寧復見義農之盛

賀今上皇帝登極表

御六龍而乘乾君臨大寶斂五福而作辟慶浹寰區邦  
命惟新天心底豫中賀恭惟皇帝陛下重華協帝下武  
繼文上漢璽而三辭為天王當楚璧而五拜作神主謳  
歌收屬歷數自歸詔皇策于千齡嗣無疆之服撫帝國

于四大包有截之區顧疲驚弗泊于駿奔而率舞自同  
于恩躍戴盆而望天象雖莫窺十日並照之光扶杖而聽詔  
書猶能罄萬歲三呼之祝



鴻慶居士集卷九